



**Sud Bosne i Hercegovine  
Sud Bosne i Hecegovine**

---

**Broj: S1 3 Iž 038216 20 Iž  
Sarajevo, 26.10.2020. godine**

Sud Bosne i Hercegovine u Sarajevu, u Apelacionom upravnom vijeću, sastavljenom od sudija Dinke Bešlagić-Čovrk kao predsjednika vijeća, Srete Crnjak i Vesne Trifunović, kao članova vijeća, odlučujući o žalbi Amela Đuldanić, Rakovčani bb, Prijedor, Bosna i Hercegovina, izjavljenoj na odluku Centralne izborne komisije Bosne i Hercegovine, broj: 05-1-07-1-998/20 od 01.10.2020. godine, o utvrđivanju i objavi broja birača upisanih u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine, na nejavnoj sjednici održanoj dana 26.10.2020. godine donio je

**R J E Š E N J E**

**Žalba se odbija.**

**O b r a z l o ž e n j e**

Odlukom Centralne izborne komisije Bosne i Hercegovine, broj i datum navedeni u uvodu, podnosiocu žalbe odbijen je upis u izvod iz Centralnog biračkog spiska za glasanje izvan BiH za Lokalne izbore 2020. godine, za ukupno 27.960 birača po prijavama podnesenim do 01.09.2020. godine.

Protiv ove odluke Begzudin Jusic putem e-mail adrese begzudin.j@gmail.com izjavio žalbu, kojom moli da mu se dostavi informacija iz kojeg razloga se Amel Đuldanić ne nalazi na biračkom spisku.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbije kao neosnovana.

Ispitujući pobijanu odluku u okviru žalbenih navoda, vijeće Apelacionog odjeljenja Suda Bosne i Hercegovine je zaključilo da žalba nije osnovana.

Prema stanju u spisu, Centrala izborna komisija je prije donošenja ožalbene odluke, a prilikom razmatranja prijave Amela Đuldanić dostavljene dana 17.08.2020. godine putem e-mail adrese begzudin.j@gmail.com, prijava za glasanje izvan BiH- Lokalni izbori 2020. godine (PRP-1), utvrdila je da dostavljeni dokaz o identitetu – kopija osobne iskaznice samo sa prednjom stranom ID, nije validan dokaz o identitetu, te da se Amel Đuldanić mogao putem internet stranice i info linije Centralne izborne komisije BiH informisati o statusu njegove prijave za glasanje izvan BiH i na taj način otkloniti nedostatak koji ogleda u činjenici da nije dostavio validne identifikacione dokumente.

Ispitujući ožalbenu odluku u okviru žalbenih navoda vijeće je zaključilo da žalba nije osnovana.

Ovo vijeće konstatuje da je CIK BiH, prije donošenja ožalbene odluke, a kako je već istaknuto, putem svoje web stranice izjestila žalitelja, da njegova prijava za glasanje izvan BiH sadrži više nedostataka, jer nije dostavljen dokaz o identitetu i ostavila mu rok da taj nedostatak otkloni. Podnositelj žalbe u ostavljenom roku nije postupio prema obavještenju CIK BiH. Naime, dostavljanje kopije osobne iskaznice samo sa prednjom stranom ID ne može se smatrati otklanjanjem nedostatka prijave.

Postupajući na način opisan u prednje utvrđenom činjeničnom stanju podnosilac žalbe je postupio suprotno odredbi člana 3.15 stav (1) Izbornog zakona BiH („Službeni glasnik BiH“ broj 23/01 do 31/16), kojom je propisano da državljanin BiH koji živi u inostranstvu, a ima biračko pravo u skladu sa Zakonom i upisan je u Centralni birački spisak, da bi se nalazio u izvodu iz Centralnog biračkog spiska dužan je da se za svake izbore prijavi CIK BiH. Prijava mora biti zaprimljena u CIK BiH prije roka koji odredi CIK BiH, u periodu nakon raspisivanja izbora. Uz popunjenu i potpisanu prijavu podnosilac prilaže i dokaz o identitetu i podatke o tačnoj adresi u inostranstvu, te izjašnjenje o opciji glasanja u diplomatsko-konzularnom predstavništvu ili putem pošte.

U konkretnom slučaju žalitelj nije uz prijavu dostavio sve potrebne i propisane podatke, tj. validan dokaz o identitetu koji bi potvrdio da su ispunjeni uslovi da se u smislu odredbe člana 5.12 stav (4) Izbornog zakona BiH nađe na izvodu iz Centralnog biračkog spiska za glasanje van BiH. Naime, uz prijavu nije dostavljen validan dokaz o identitetu, jer se validnim dokazom o identitetu smatra lična karta /osobna iskaznica ili vozačka dozvola ili pasoš/putnovnica Bosne i Hercegovine.

Takođe, napomene radi, žalitelju nije oduzeto biračko pravo za Lokalne izbore 2020. godine, nego samo mogućnost glasanja putem pošte izvan BiH, jer isti može glasati na redovnom biračkom mjestu u općini u kojoj ima prijavljeno prebivalište u BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

**PREDSJEDNIK VIJEĆA**  
**S U D I J A**  
**Dinka Bešlagić-Čovrk**